



ARUBA MESTER TA * ORGUYOSO DI SU * CARNIVAL

Hopi hende a pensa cu mirando e tempo corto cu tabata tin pa prepara un grupo, cu e aña aki Carnaval di Aruba lo no bira exitoso. Contrario na tur e pensamentonan aki, e Carnaval di e aña aki tabata yen di saús, alegría y lo principal bon bon coordina.

ELECCIONNAN DEN DISTRICTO
Despues cu eleccionnan di prins y pancho, tanto hubenil como grandi a tuma lugar, na unda tabata tin gran interes tanto den participacion como di e parti di publico, eleccionnan di reina di districto y clubnan a cuminsa.

Tur districtonan a haya nan reina infantil, hubenil y grandi. Clubnan a cuminsa anuncia o eligi nan reinanan mescos ta e caso cu diferente di nos schoolnan aki na Aruba.

Aruba tabata ariba bao den nan preparacion. E sanger di Carnaval ta den curpa y no tabata tin nada pa stroba nan di participa den e gran parada.

CALYPSONIAN CONTEST

Dia 12 di januari a tuma lugar e contest di calypso, na unda "Young Quick Silver" a sali rey di calypso, mientras cu Lord Boxo a gana e roadmarch cu e famoso "meaty", cual segun nos ta un di e mihor roadmarchnan te ainda.

ROBERT JEANDOR REY DI TUMBA

Merecidamente Robert Jeandor a bolbe bira rey di tumba e aña aki. Esaki ta e di 3 aña consecutivo cu Robert Jeandor a gana e corona como rey di tumba.

Robert Jeandor actualmente ta un di nos mihor cantantenan di tumba y tambe su actuacion ta algo formidable.

Conociendo Robert Jeandor como un cabayero gentil, nos ta spera cu otro aña atrobe e lo bin bon prepara.

Pabien Robert, pabien Los Juveniles.

ELECCION DI REINA HUBENIL

Bao enorme interes a tuma lugar eleccion y coronacion di reina di Carnaval hubenil di Aruba.

Nada menos cu 19 candidata, representando tanto clubnan social, organisacionnan y schoolnan a tuma parti na e eleccion aki.

E aña aki Carnaval hubenil a celebra su di 15 aña di existencia.


Como reina hubenil a keda eligi e representante di Juliana School, Srta. Connie Irausquin, mientras cu Srta. Arletta Alexander di Amity Organization a keda eligi como first runner-up.

ELECCION DI REINA DI CARNIVAL

Den un stadion completamente yen a tuma lugar eleccion y coronacion di nos reina di Carnaval 1978. E publico presente por a goza di un show bon prepara, mientras cu tabata tin varios clubnan cu a bin bon prepara pa apoya nan reinanan.

BIANCA HOEK, REINA DI DISTRICTO O'STAD, E SORPRESA DI ANOCHI

Ningun momento so e publico presente por a pensa cu e representante di O'Stad, Srta. Bianca Hoek





lo worde eligi como reina di Carnaval di Aruba pa aña 1978. E tabata tin un actuacion simpel, mientras cu su bistir tambe tabata simpel. Pero di otro banda e tin dos wowo berde dominante y tambe un altura, cu poco mujer Arubano ta posee. Como primera finalista a keda eligi e representante di Aruba Tivoli Club, cual club a celebra su di 35 aña celebrando Carnaval.

Srta. Evelyn Merryweather tabata e favorita pa e corona, desde cu ela worde eligi como reina di Aruba Tivoli Club.

Tanto na Srta. Bianca Hoek como Evelyn Merryweather ta bay nos palabranan di felicitacion.

PARADA DI MUCHA

E parada di mucha na O'Stad e aña aki tabata bon prepara y tur gruponan a haci nan posibel, pa a presenta lo mihor.

Tivoli Club, celebrando nan di 35 aña di existencia a presenta algo inolvidable y a merece di a worde eligi atrobe e grupo di aña. Esaki ta e caso tambe cu Silvia Lourens su grupo, cual tabata bon coordina y acaba.

Nos mester bisa cu Carnaval di Aruba ta den sanger di nos chikitanan. Nos ta spera cu otro aña mayornan lo laga na yiunan join mas tanto e Carnaval di mucha, pa e Carnaval di mucha di Aruba keda esun mas grandi cu cualquier Carnavalnan di otro islanan o paisnan.

PARADA GRANDI

Manera tur hende a comenta caba e Carnaval di e aña aki a surpasa tur Carnavalnan di pasado tanto den luho como den coordinacion y color. Mayoria di e gruponan a bin bon prepara y musica no tabata hasi falta. Aruba Tivoli Club manera semper a roba e show, tanto cu nan carosanan, como e grupo mes. Nos mester acepta cu pa luho, un Carnaval di Aruba sin Aruba Tivoli Club, no ta sobresali.

E hendenan aki ta gasta miles y miles di florin na disfraz so y ta gracias na nan cu Aruba su Carnaval ta un di e mas grandinan den mundo. Nos mester bisa cu e aña aki tur cos a bay na ordu y sin problema. Ta di spera cu e Carnaval 25 en berdad lo bira e Carnaval



cu lo pasa pa historia.

Un bes mas nos ta felicita tanto e miembronan di S.A.C. y e pueblo di Aruba pa e Carnaval bon prepara y pa e exito d'esaki.

Pabien Pueblo di Aruba.

SEÑOR MILO CROES

Nos no por keda sin menciona un persona cu gracias na su esfuerzo y boluntad, awe Carnaval di Aruba ta na unda e ta awor.

Señor Milo Croes, president di S.A.C., un homber encansable, cu semper ta ricibi tur zundramento y critica, pero cu hopi biaha ta acepta esaki sin pone e culpa riba su otro miembronan.

Señor Milo Croes ta un persona cu no solamente ta activo den Carnaval, pero den hopi otro organiza-

cionnan, tambe ta celebra e luna aki su di 40 aña den servicio di gobierno Antiyano.

Laga nos no insulte, pero aprecia loke un yiu di tera ta hasi pa hiba un di e evenementonan mas grandi celebra aki na Aruba, esta Carnaval, na unda e ta awor.

Milo danki y pabien cu bo 40 aña den servicio di gobierno di Antiyas y tambe cu e Carnaval 24, na unda enberdad Aruba tabata e gran teatro y tabata cada rato den liderato.

SUGERENCIANAN:

1. Cuminsa tempran cu celebracion di Carnaval 25, cu bailenan publico riba caya den diferente districtonan, na unda gobierno insular por yuda paga e bandanan. Esaki mester sosode door di sera diferente cayanan y laga e publico baila den e cayanan aki.
2. Si ta posibel cambia e ruta di e parada, cu menos curvanan.
3. En bes di pone premionan di placa, entrega trofeonan di balor, cual lo worde mas aprecia.
4. Termina e parada, cu un gran baile publico, Carnaval mester por worde celebra mucho mas largo. (Na Trinidad y Brasil nan ta baila 3 dia largo).
5. Permeti mucha mujernan cu edad pa participa pa reina di Carnaval, pero cu ainda ta bay school, tuma parti na eleccion di reina di Carnaval, asina ta bin mucho mas competencia.
6. Combence schoolbestuur cu e parada di school por tuma lugar atrobe.
7. Mester bin mas gruponan comico, pasobra Carnaval no ta luho so, pero ta un temporada di locura.
8. Cambia e carosanan di tanto e reina hubenil como esun grandi pa algo mucho mas representable.
9. Mas hende tuma parti na e parada, en bes di para cant'i caminda. Mas hende participa mas grandi nos Carnaval ta.

Esakinan ta algun sugerencianan, pero nos ta spera cu den curso di e aña aki di bin cu mas.